



Sumáriu Kazu
Tribunál Distritál Dili
Períodu Jullu 2018

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fô iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 53

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade fizika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	17
Artigu 154 KP no konjuga ho artigu 2, 3, no 35(a) no 36 LKVD	Maus tratus ba kónjuje	8
Artigu 177 (KP)	Abuzu seksuál ba menór	2
Artigu 172 (KP)	Violasaun seksuál	1
Artigu 177, 178 & 141(KP)	Abuzu seksuál ba menór, aktu seksuál ho adolexente no interrupsaun ba gravidéz	1
Artigu 179 KP	Abuzu seksuál ba ema ne'ebé labele reziste	1
Artigu 178 KP	Aktu seksuál ho adolexente	2

Artigu 138, 23& 211 KP	Omisídiu simples, tentativa omisídiu simples no arma proibida	1
Artigu 23, 138&Lei Nú. 5/2017	Tentativa omisídiu simples no armas brankas	1
Artigu 139 KP	Omisídiu agravadu	1
Artigu 295 &274 KP	Pekulatu no administrasaun danoza	1
Artigu 274 & 297 KP	Abuzu podér no administrasaun danoza	1
Artigu 299 KP	Partisipasaun ekonómika iha negósiu	1
Artigu 163, 164 & 303	Tráfiku ho ema ho agravasaun no Falsifikasaun ba dokumentu ka notasaun téknika	1
Artigu 207 &Lei Nú. 5/2017	Krime kondusaun sein karta no armas brankas	1
Artigu 296 KP	Pekulatu ho uzu	1
Artigu 253 KP	Roubu	1
Lei Nú. 5/2017	Armas brankas	1
Artigu 145 &258 KP	Ofensa ba integridade fizika simples no danu simples	1
Artigu 145 (KP)	Ofensa ba integridade fizika simples	8
Artigu 211 KP	Arma proibida	1
Totál		53

2. Totál desizaun ne'ebé JSMP monitoriza : 29

Tipu Pena	Númeru
Pena prizaun	1
Pena prizaun, suspensaun ba prizaun nia ezekusaun (artigu 68 KP) no Prizaun nia suspensaun ho devér (artigu 69)	1
Suspensaun ba pena prizaun nia ezekusaun ho regra konduta (artigu 70 letra g) KP	3
Suspensaun ba prizaun nia ezekusaun (artigu 68 KP)	11
Pena multa (artigu 67 KP)	1
Suspensaun ba prizaun nia ezekusaun (artigu 68 KP) no pena multa (artigu 67 KP)	2
Omologa dezisténsia keixa (artigu 262 KPP)	5

Admoestasaun (artigu 82 KP)	3
Absolve	2
Totál	29

3. Total kazu sira ne'ebé adia tuir JSMP nia monitorizasaun : 4

Razaun adiamentu	Númeru
Arguidu no lezada la marka	4
Totál	4

4. Totál kazu sira ne'ebé sei kontinua tuir JSMP nia monitorizasaun : 19

B. Deskripsaun sumáriu ba desizaun kazu sira ne'ebé JSMP monitoriza:

1. Krime aktu seksuál ho adolescente

Nú. Prosesu : 0089/17.PDDIL
 Kompozisaun Tribunál : Koletivu
 Juis : Dr. Euzébio Xavier Victor, Dra. Jacinta Correia, Dra. Ana Paula Fonseca
 Prokuradór : Dra. Bemvinda do Rosario
 Defeza : Dr. Jose Soares
 Tipu pena : Pena prizaun tinan 3 suspende ba tinan 5 ho regra ba konduta

Iha 02 Jullu 2018, Tribunál Distritál Dili prezide leitura akordaun ba krime aktu seksuál ho adolescente ne'ebé envolve arguidu SdS hasoru lezada CD ho idade tinan 14 fulan 3, iha Distritu Dili.

Akuzasaun Prokuradór

Prokuradór akuza katak iha 15 Juñu 2014, maizumenus tuku 14.30 lokraik, lezada fila hosi eskola no tama ba nia kuartu atu troka ropa. Arguidu tama tuir lezada no ho liman karuk buti metin lezada nia ibun no liman loos dada lezada ba kama laran no hatoba lezada. Hafoin arguidu lori nia liman loos kolu lezada nia kalsina, no liman karuk kolu nia kalsa to'o ain-tur no halo relasaun seksuál ho lezada to'o ejakula. Bainhira rona ema bolu atu sosa sasan iha lezada nia kios hafoin arguidu hader hosi lezada nia leten no haruka lezada ba atende ema sosa sasan. Arguidu halo relasaun seksuál ho lezada bei-beik ona no to'o ikus lezada grávida no hahoris oan mane ida.

Prokuradór akuza arguidu kontra artigu 172 KP kona-ba violasaun seksuál ho moldura penál hosi tinan 5 to'o 15 ho agravaun tuir artigu 173 (d) KP tanba lezada nia idade ki'ik liu 17.

Produsaun ba prova sira

Iha prosesu julgamentu, arguidu rekoñese katak halo duni relasaun seksuál ho lezada maibé la obriga tanba arguidu no lezada iha relasaun namoranune'e bainhira arguidu atu ba eskola bruder, lezada impede arguidu. Arguidu deklara katak lezada nia aman duni-sai nia hosi lezada nia uma bainhira hatene lezada isin-rua. Arguidu mós deklara katak nafatin simu lezada nu'udar nia feen, tanba sira nain rua iha ona oan ida.

Entretantu lezada kontinua konfirma faktu sira iha akuzasaun no deklara katak iha momentu ne'ebá nia la hakilar tanba tauk nia alin no viziñu rona. Lezada mós deklara katak arguidu dala rua rei nia iha kios laran. Aleinde ne'e, lezada deklara katak agora dadaun sira nia oan halo ona tinan 2 fulan 6.

Testemuña DdC nu'udar lezada nia aman depoimenta katak testemuña diskonfia lezada isin rua bainhira hare lezada hatais farda atu ba tuir orientasaun iha eskola. Nune'e, testemuña husu ba lezada nia inan atu husu lezada nia kondisaun ne'e. Bainhira testemuña no lezada nia inan husu kona-ba lezada nia kondisaun, lezada hatan katak nia isin-rua fulan neen hosi arguidu. Testemuña la simu no ba halo keixa kedas arguidu iha polisia. Testemuña konsidera arguidu ne'ebé hela iha sira nia uma, hanesan nia oan ona, nune'e nunka diskonfia arguidu no lezada iha relasaun maske sempre la'o hamutuk ba fatin ruma.

Alegasaun final

Prokuradór konsidera katak akontese duni relasaun seksuál maske la ho obrigasaun no forsa tanba antes ne'e arguidu rei lezada dala rua ona. Prokuradór konsidera katak iha kazu ne'e la konsege hetan elementu obriga no forsa. Maibé tanba lezada foin tinan 14 resin, nune'e, husu ba tribunál atu aplika pena prizaun tinan rua suspende ba tinan rua.

Iha parte seluk, defeza husu atu tribunál absolve arguidu tanba arguidu ninia hahalok la prenxe elementu krime tuir akuzasaun. Defeza konsidera relasaun seksuál ne'e akontese dala barak no ho konsentimentu hosi arguidu no lezada. Kona-ba arguidu halai hosi uma, la'os tanba arguidu atu husik lezada maibé tanba lezada nia aman mak duni arguidu no to'o agora mós arguidu nafatin hein lezada.

Desizaun

Depoide avalia faktu sira ne'ebé prodús durante julgamentu, tribunál la prova arguidu uza forsa ka ameasa bainhira halo relasaun seksuál ho lezada. Bazeia ba lezada nia sertidaun batismu, tribunál hetan katak lezada atinje ona tinan 14 liu fulan 3 bainhira kazu ne'e akontese. Tanba ne'e tribunál halo alterasaun jurídiku hosi artigu 172 no 173 KP ba fali aktu seksuál ho adolescente tuir artigu 178 KP.

Tribunál konsidera katak arguidu abuzo lezada nia inespériensia bainhira halo relasaun seksuál ho lezada. Bazeia ba alterasaun no konsiderasaun ne'e, tribunál kondena arguidu ho pena prizaun tinan tolu suspende ba tinan lima no kondena arguidu atu apresenta-an periodikamente ba tribunál kada fulan ida dala ida durante tinan ida.

2. Krime ofensa ba integridade física simples

Nú. Prosesu : 0670/16.DICMR
Kompozisaun Tribunál : Singulár
Juis : Dra. Jumiaty Freitas
Prokuradór : Dra. Remízia de Fátima da Silva
Defeza : Dr. Miguel Acaçio (advogadu estajáriu)
Tipu Pena : Omologa ba dezistansia keisa

Iha 03 Jullu 2018, Tribunal Distritál Dili prezide julgamentu tentativa konsiliaun ba krime ofensa ba integridade física simples ne'ebé envolve arguidu Alexandre Amaral hasoru Ilda Ximenes nu'udar nia viziñu, iha ne'ebé akontese iha Distritu Dili¹.

Produsan ba prova sira

Antes tama ba produsaun ba prova sira, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dada fali nia-keixa maibé ho kriteria katak arguidu la bele provoca tan lezada iha futuru. Arguidu konkorda ho kriteria ne'e, arguidu husu diskulpa ba lezada no promete sei la provoca tan lezada iha futuru.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu dame hosi parte rua, tribunál konklui prosesu ne'e no omologa dezisténsia keixa ne'e.

3. Krime maus-tratus ba kónjuje

Nú. Prosesu : 0102/17.DIDIL
Kompozisaun Tribunál : Singulár
Juis : Dra. Albertina Neves, Dr. Antonino Helder no Dr. Jumiaty Freitas
Prokuradór : Dr. Bartolomeu de Araujo

¹Tribunál la lee sai akuzasaun prokuradór nian

Defeza : Dr. Estaquie Pereira Guterres
Tipu pena : Pena prizaun fulan 3 suspende ba tinan 2 ho regra ba konduta

Iha 03 Jullu 2018, Tribunál Distritál Dili prezide julgamentu leitura akordaun ba krime maus-tratus ba kónjuje ne'ebé envolve arguidu AGN hasoru nia feen, iha Distritu Dili.

Akuzasaun Prokuradór

Prokuradór akuza katak iha 20 Jullu 2017, maizumenus tuku 15.55 lokraik, arguidu rakut lezada ninia fuuk no dudu ba parede. Arguidu tuku dala ida iha lezada nia ibun, tebe dala rua iha kabun parte loos no karuk. Arguidu tuku dala ida iha lezada nia ulun no riba lezada ba rai. Durante arguidu ho lezada forma uma kain arguidu sempre baku lezada, maibé lezada la hato'o keixa.

Antes agresaun ne'e akontese, lezada simu informasaun katak nia avo mate, nune'e lezada bolu arguidu ne'ebé hemu hela tua ho kolega sira atu prepara-an ba foho. Maibé arguidu hatan ba lezada katak nia laiha osan atu ense mina. Tanba ne'e, lezada haruka arguidu ba husu osan iha arguidu nia inan-aman. Arguidu ba husu duni maibé arguidu nia inan-aman mós dehan katak sira laiha osan, nune'e arguidu no lezada diskute malu to'o mosu agresaun refere.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál hosi tinan 2 to'o 6 prizaun.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak nia halo agresaun hasoru lezada tanba lezada mak kaer uluk arguidu ninia kameja-gola. Arguidu rekoñese katak antes ne'e, iha tinan 2016 arguidu baku duni lezada maibé haluha ona faktu sira. Arguidu arrepende ninia hahalok no deklarata katak diak malu ona ho lezada no promete sei la repete ninia hahalok ne'e hasoru lezada iha futuru.

Aleinde ne'e, lezada kontinua reforsa faktu sira iha akuzasaun prokuradór nian no konfirma mós ho deklarasaun arguidu nian katak iha tinan 2016 arguidu halo duni agresaun hasoru lezada.

Alegasaun final

Prokuradór konsidera arguidu provadu komete krime hasoru lezada tuir faktu sira ne'ebé deskreve iha akuzasaun. Arguidu mós sempre halo agresaun hasoru lezada iha tinan 2016. Tanba ne'e, atu prevene arguidu la komete tan krime iha futuru, husu ba tribunál atu kondena arguidu ho pena prizaun maibé suspende ninia ezekusaun.

Entretantu defeza husu ba tribunál atu aplika pena ne'ebé kmaan ba arguidu tanba konsidera sirkunstánsia atenuante sira hanesan arguidu konfesa faktu sira, arrepende ninia hahalok no promete sei la komete tan krime hasoru lezada iha futuru.

Desizaun

Depoide avalia faktu sira hotu ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu hirak ne'e, tribunál kondena arguidu ho pena prizaun fulan tolu suspende ba tinan rua. Tribunál mós aplika dever adisionál ba arguidu atu apresenta-an periodikamente fulan ida dala ida durante fulan tolu iha tribunál.

4. Krime ofensa ba integridade física simples

Nú. Prosesu : 0269/17.PDDIL
Kompozisaun Tribunál : Singulár
Juis : Dra. Albertina Neves
Prokuradór : Dr. Renato Bere Nahak
Defeza : Dra. Elda Baptista Gomes (advogadu privadu estajiária)
Tipu pena : Pena prizaun fulan 2 suspende ba tinan 1

Iha 03 Jullu 2018, Tribunál Distritál Dili prezide julgamentu leitura sentensa ba krime ofensa ba integridade física simples ne'ebé envolve arguida Etelvina José Flaviana hasoru lezada Francisca Xavier, iha Distritu Dili.

Akuzasaun Prokuradór

Prokuradór akuza arguidu katak iha 17 Jullu 2017, tuku 07.00 dader, lezada ba iha arguida nia uma atu husu nia osan US\$400.00 ne'ebé arguida deve. Maibé arguida lakohi selu no sira diskute-malu. Arguida rakut lezada nia oin no les lezada nia faru. Aktu ne'e, aleinde halo lezada nia faru nakles, lezada sofre kanek iha nia oin.

Porkuradór akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa.

Produsaun ba prova sira²

Iha prosesu julgamentu, arguida rekoñese katak nia impresta duni lezada nia osan US\$400.00 ho nia jurus (funan) porsentu 25 kada fulan. Arguida mós deklara katak durante ne'e nia selu osan funan no osan inan maibé selu tarde iha fulan neen ikus. Nune'e iha 17 Jullu 2017, arguida ba iha xefi aldeia ho osan funan fulan rua nian ho montante US\$200.00 ho intensaun atu xefi aldeia

²Antes tama ba produsaun ba prova, tribunál halo tentativa konsiliaun tanba krime ne'e nia natureza semi públiku maibé lezada lakohi konsilia no hakarak kontinua prosesu kazu ne'e.

mak entrega ba lezada tanba antes ne'e mosu ona problema no xefe aldeia mak rezolve. Maibé antes arguida to'ó iha xefi aldeia nia uma, derepente lezada hosi kotuk rakut arguida nia fuuk no ikus mai sira rakut malu. Arguida deklarata katak iha akontesimentu ne'e lezada tata kotu tiha arguida nia liman fuan ida maibé arguida la hato'ó keixa.

Entretantu lezada konfirma totalmente faktu sira iha akuzasaun prokuradór nian no deklarata katak nia tata kotu arguida nia liman fuan tanba arguida hatama nia liman fuan to'ó iha lezada nia ibun laran no tenta atu dada sai lezada nia nanal.

Testemuña Milanoza Xavier nu'udar lezada nia oan feto depoimenta katak nia hatene arguida deve lezada nia osan maibé kona-ba akontesimentu rakut malu ne'e testemuña la hare tanba altura ne'ebá testemuña ba tiha ona eskola.

Alegasaun final

Prokuradór konsidera arguida provadu komete krime tuir faktu sira iha akuzasaun prokuradór nian, nune'e, husu ba tribunál atu tetu no fó pena ne'ebé justu.

Entretantu defeza, husu ba tribunál atu altera krime ofensa ba integridade fizika simples ba fali krime ofensa korporál resíproka ne'ebé prevee iha artigu 151 KP. Defeza husu ba tribunál atu kondena arguidu ho pena ne'ebé justu tanba depoisde produsaun ba prova sira, hatudu katak la'os deit arguida mak halo agresaun hasoru lezada maibé lezada mós halo agresaun hasoru arguidu ka rakut malu to'ó lezada tata kotu arguida nia liman fuan ida.

Desizaun

Depoisde avalia faktu provadu sira hotu, tribunál matein akuzasaun prokuradór nian no konklui katak arguida provadu independentemente rakut lezada nia oin no rezulta kanek kiik iha lezada nia oin sorin-karuk. Tribunál mós prova katak kazu ne'e akontese tanba diskute malu kona-ba osan US\$400.00 ne'ebé lezada deve. Bazeia ba faktu provadu hirak ne'e, tribunál kondena arguida ho pena prizaun fulan rua suspende ba tinan ida.

5. Krime pekulatu ho uzu

Nú. Prosesu	: 0043/17. PGGCC
Kompozisaun Tribunál	: Singulár
Juis	: Dra. Zulmira A. Barros da Silva
Prokuradór	: Dr. Jacinto Babo Soares
Defeza	: Dr. Cancio Xavier
Tipu pena	: Pena prizaun fulan 6 suspende ba tinan 1

Iha 03 Jullu 2018, Tribunál Distritál Dili prezide julgamentu leitura sentensa ba krime pekulatu ho uzu ne'ebé envolve arguidu Henrique da Costa Araujo hasoru Estadu, iha Distritu Dili.

Akuzasaun Prokuradór

Prokuradór akuza katak arguidu nu'udar funsionáriu públiku iha Dirasaun Nasional ba Patrimóniu Estadu iha Ministériu Finansa ne'ebé responsavel ba seksaun lelaun ninian. Nu'udar funsionáriu públiku, Ministériu Finansa entrega kareta ida marka Toyota ho sapa matrikula 01-076G ba arguidu hodi uza ba operasionál nian. Iha 03 Marsu 2017, maizumenus tuku 11.00 dader, arguidu kondús kareta refere no tula militante sira hosi partidu Fretilin nian ba tuir atividade kampaña prezidensiál ba kandidatu presidente Sr. Francisco Guterres Lu-Olo iha Munisípiu Ermera. Arguidu kondús kareta refere sein koñesimentu hosi Diretór Lojístiku no Jestaun ba Patrimoniun nian (JdS).

Prokuradór akuza arguidu kontra artigu 296 KP kona-ba krime pekulatu ho uzu ho moldura penál to'o tinan 2.

Produsaun ba prova sira

Iha prosesu julgamentu, arguidu rekoñese katak nia lori duni kareta governu nian ne'e ba Ermera tanba arguidu nia kolega funsionáriu ida (GM) ne'ebé mak nu'udar funsionáriu iha Dirasaun Patrimóniu nian mak husu ajuda ba arguidu atu tula GM ne'e nia-feen no sasan sira ba iha Ermera tanba kolega ne'e nia aman mate. Arguidu rekoñese katak nia tula duni simpatizante sira ba kandidatu Lu-Olo iha Tasi-Tolu no hatuun iha Gleno maibé arguidu deklara katak nia la tuir kampaña.

Testemuña GM depoimenta katak nia husu duni ajuda ba arguidu atu tula sasan ba Ermera tanba testemuña nia aman mate. Testemuña mós konfirma katak kareta ne'ebé sira uza sein koñesimentu hosi Diretór Lojístika no Jestaun ba Patrimóniu nian.

Alegasaun finál

Prokuradór konsidera arguidu provadu komete krime tuir faktu sira iha akuzasaun no husu ba tribunál atu aplika pena multa ba arguidu.

Entretantu, defeza husu ba tribunál atu aplika pena admoestasaun tanba arguidu konfesa, arrepende ba nia hahalok no responsabiliza ba família. Maibé se tribunál iha hanoin seluk, husu ba tribunál atu aplika pena ne'ebé justu no adekuadu.

Desizaun

Depoizde avalia faktu sira hotu, tribunál prova katak arguidu komete krime pekulatu ho uzu tuir faktu sira iha akuzasaun. Bazeia ba faktu provadu sira ne'e, inklui tetu ba sirkunstánsia hotu-hotu tribunál kondena arguidu ho pena prizaun fulan neen suspende ba tinan ida.

6. Krime ofensa ba integridade fizika simples

Nú. Prosesu : 0556/17.DICMR
Kompozisaun Tribunál : Singulár
Juis : Dra. Albertina Neves
Prokuradór : Dra. Bemvinda Do Rosario
Defeza : Dra. Agustinha de Oliveira
Tipu pena : Omologa ba dezisténsia keixa

Iha 05 Jullu 2018, Tribunál Distritál Dili prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Manuel Pereira Ximenes hasoru niasubriña, Juisinha Penalva Silva Lopes, iha Distritu Dili³.

Produsan ba prova sira

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dada fali nia-keixa tanba arguidu husu ona deskulpa ba lezada. Aleinde ne'e, arguidu konkorda ho pedidu dezisténsia hosi lezada.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu dame hosi parte sira, tribunál konklui prosesu ne'e no omologa akordu dame entre parte sira.

7. Krime ofensa ba integridade fizika simples no danu simples

Nú. Prosesu : 0111/17.ERSIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. Osorio de Deus
Defeza : Dr. Estaquie Pereira Guterres
Tipu pena : Omologa dezisténsia keixa

Iha 06 Jullu 2018, Tribunál Distritál Dili liuhosi julgamentu movel iha Distritu Ermera prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Simão Soares, Belzito Soares no Amanto de Araújo (maun-alin) hasoru lezadu Fernando Manuel Maia Exposto no Rui Maria dos Santos, iha Distritu Ermera.

³Tribunál la lee sai akuzasaun prokuradór nian

Akuzasaun Prokuradór

Prokuradór akuza katak iha 07 Maiu 2017, maizumenus iha tuku 01.00 madrugada, arguidu Amanto de Araújo tuku dala ida iha lezadu Rui nia hasan no rezulta bubu no metan. Aleinde ne'e, arguidu sira tuda lezadu sira nia uma no rezulta kalen tahan rua nakles no odamatan ida estragus. Problema ne'e hetan intervensaun hosi polisia.

Antes kazu ne'e akontese, arguidu sira ho katana ba hakilar no tuda lezadu sira nia uma. Arguidu sira diskonfia lezadu sira nia feton kaer ai kulit-aat hodi halo moras arguidu sira nia inan. Lezadu Fernando sai ba hasoru arguidu sira no dehan katak nia feton laiha fatin. Lezadu mós la simu arguidu sira ne'ebé dun ninia feton buan. Nune'e mosu diskute malu entre sira to'o akontese agresan hirak ne'e.

Prokuradór akuza arguidu kontra artigu 145 KP kona-ba ofensa ba integridade fizika simples no kontra artigu 258 KP kona-ba danu simples ho moldura penál to'o tinan 3 ka multa.

Produsaun ba prova sira

Krime ne'e ho natureza semi públiku nune'e antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu sira no lezadu sira.

Iha prosesu konsiliaun ne'e, lezadu sira hakarak dada fali sira nia-keixa, tanba antes ne'e sira rezolve ona iha igreja envolve xefe suku, padre no família hosi parte rua. Aleinde ne'e, arguidu sira mós husu ona deskulpa ba lezadu sira no deklarata katak arrepende ona sira ninia hahalok. Arguidu sira promete sei la repete tan hahalok hanesan ne'e iha futuru.

Alegasaun finál

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu sira no akordu dame hosi parte sira, tribunál konklui prosesu ne'e no omologa akordu dame entre parte sira.

8. Krime ofensa ba integridade fizika simples

Nú. Prosesu	: 0058/17.ERSIC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Osorio de Deus
Defeza	: Dr. Estaquie Pereira Guterres
Tipu pena	: Omologa dezisténsia keixa

Iha 06 Jullu 2018, Tribunál Distritál liuhosi julgamentu movel iha Distritu Ermera prezide julgamentu tentativa konsiliaun ba krime ofensa ba integridade fizika simples ne'ebé envolve arguida Angelica Madeira, Julio de Jesus Madeira no Natalino Soares hasoru lezada Fernanda Xavier de Jesus, iha Distritu Ermera.

Akuzasaun Prokuradór

Prokuradór akuza katak iha 13 Marsu 2017, maizumenus iha tuku 19.13 kalan, arguida no arguidu sira ba iha lezada nia uma no hakilar dehan “*serang-serang*,”.To’o iha lezada ninia uma arguidu Natalino Soares tuda fatuk tama liu ba iha lezada nia uma laran no kona iha lezada ninia kotuk-laran. Arguida Angelica Madeira, hakbesik-an ba lezada no kaer metin lezada ninia liman no fuuk. Entretantu arguidu Julio tuku lezada ninia kotuk-laran. Antes kazu ne’e akontese, lezada ba iha arguidu no arguida sira nia uma hodi husu tuir arguida nia oan mane ne’ebé hakerek liafuan mal hasoru lezada nia oan feto iha estrada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to’o tinan 3 ka multa.

Produsaun ba prova sira

Krime ne’e ho natureza semi públiku nune’e antes tama ba produsaun ba prova sira, juis husu atu halo tentativa konsiliaun ba arguida no arguidu no lezada.

Iha prosesu konsiliaun ne’e, lezada hakarak dada fali nia-keixa, tanba iha ona akordu dame entre sira tanba antes ne’e rezolve ona iha xefi suku no arguida no arguidu sira entrega ona US\$50.00 no fahi ida ba lezada. Aleinde ne’e arguida no arguidu sira mós arrepende sira nia hahalok no promete sei la repete hahalok ne’e iha futuru.

Alegasaun final

Prokuradór no defeza konkorda ho akordu dame ne’ebé parte rua deside ona no husu ba tribunál atu omologa prosesu ne’e.

Desizaun

Bazeia ba pedidu dezisténsia hosi lezada no akordu dame hosi parte sira, tribunál konklui prosesu ne’e no omologa akordu dame entre parte sira.

9. Krime ofensa ba integridade fizika simples ho natureza violénsia doméstika

Nú. Prosesu : 0144/16.DIBCR
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araujo

Defeza : Dr. Miquel A. Fernandes (advogadu privadu estajiáriu)
Tipu pena : Pena prizaun fulan 1 suspende ba tinan 1

Iha 09 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu NXdS hasoru nia feen, iha Distritu Dili.

Akuzasaun Prokuradór

Prokuradór akuza katak iha 01 Agostu 2016, maizumenus tuku 07.00 dader, arguidu foti sinelus no tuda kona iha lezada nia kotuk-laran no rezulta lezada sofre moras iha lezada nia-kotuk-laran. Antes kazu ne'e akontese, lezada fase hela ropa no arguidu husu atu lezada halo hela kafe ba nia. Maibé lezada hatan ba arguidu katak sira nia tia halo ona kafe no haruka arguidu ba hare kafe ne'e iha meza. Maibé depois arguidu tolok no koalia liafuan mal hasoru lezada. Arguidu mós dehan ba lezada katak dader ne'e lezada halo saida, se lakohi hare arguidu diak liu lezada fila ba nia uma, nune'e arguidu tuda lezada ho sinelus.

Iha loraon tuirmai, lezada husu arguidu kona-ba lezada diskonfia arguidu iha relasaun amante ho fetu seluk maibé arguidu nega. Meske nune'e lezada nafatin insisti no dehan ba arguidu katak arguidu iha ona fetu seluk mak duni lezada ne'e. Lezada sente la satisfás no ba hela tiha iha nia maun nia uma no liutiha loraon haat mak arguidu ba bolu fali lezada fila-fali mai hamutuk ho arguidu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok. Arguidu mós deklarata katak liu tiha loraon haat foin sira diak malu. Depois akontesimentu ne'e to'o agora arguidu la baku tan ona lezada. Tanba arguidu konfesa hotu faktu iha akuzasaun, Prokuradór husu ba tribunál atu la rona ona deklarasaun lezada nian.

Alegasaun finál

Prokuradór konsidera arguidu provadu komete krime hasoru lezada tui faktu sira iha akuzasaun. Tanba ne'e, atu prevene arguidu la komete tan krime iha futuru, husu ba tribunál atu kondena arguidu ho pena prizaun fulan ida suspende ba tinan ida.

Enkuantu defeza husu ba tribunál atu aplika pena ne'ebé kmaan ba arguidu tanba konsidera sirkunstánsia atenuante sira hanesan arguidu konfesa faktu sira, arrepende ninia hahalok no promete sei la komete tan krime hasoru lezada iha futuru.

Desizaun

Depoide avalia faktu relasionadu sira hotu, tribunál konsidera katak arguidu provadu komete duni krime tuir faktu sira iha akuzasaun. Bazeia ba faktu provadu hirak ne'e, tribunál konklui prosesu ne'e no kondena arguidu ho pena prizaun fulan ida suspende ba tinan ida.

10. Krime ofensa ba integridade fizika simples ho natureza violénsia doméstika

Nú. Prosesu : 0009/17.DINFT
Kompozisaun Tribunál : Singulár
Juis : Dra. Sribuana da Costa
Prokuradór : Dra. Bemvinda do Rosario
Defeza : Dr. Rui Manuel Guterres
Tipu pena : Pena prizaun fulan 3 suspende ba tinan 1

Iha 09 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CAL hasoru nia feen, iha Distritu Dili.

Akuzasaun Prokuradór

Prokuradór akuza katak iha 30 Janeiru 2017, maizumenus tuku 07.00 dader, arguidu no lezada diskute malu kona-ba lezada nia aman atu lori sira nia oan ba Oekusi. Durante sira diskute malu hela, lezada hisik nia liman kona iha arguidu nia oin, nune'e arguidu tuku dala neen iha lezada ninia kotuk-laran, tuku dala ida iha reen-toos no uza sintu baku dala ida iha lezada nia kotuk-laran. Aktu hirak-ne'e rezulta lezada sofre moras iha kotuk-laran no bubu iha nia reen-toos.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok. Arguidu mós deklarata katak nia husu ona deskulpa ba lezada no sira diak malu ona.

Entretantu, lezada kontinua konfirma faktu sira iha akuzasaun no deklarata katak diak malu ona ho arguidu. Lezada mós deklarata katak arguidu primeiravés komete krime hasoru lezada no arguidu mak sustensa lezada ho sira nia oan nain tolu.

Alegasaun final

Prokuradór mantein faktu sira iha akuzasaun nune'e atu prevene arguidu la repete ninia hahalok ne'e iha futuru no hare mós ba krimé violénsia doméstika ne'ebé aas tebes hosi loron ba loron, husu ba tribunál atu kondena arguidu ho pena prizaun maibé suspende ninia ezekusaun.

Entretantu defeza husu ba tribunál atu aplika pena ne'ebé kmaan ba arguidu tanba arguidu konfesa faktu sira iha akuzasaun, arrepende ninia hahalok no tau matan ba lezada no sira ninia oan nain tolu.

Desizaun

Depoisde avalia faktu asociadu sira hosi kazu ne'e, tribunál konklui katak arguidu provadu komete krime tuir faktu sira iha akuzasaun. Bazeia ba faktu provadu no sirkunstánsia relevante sira hotu-hotu, tribunál kondena arguidu ho pena prizaun fulan tolu suspende ba tinan ida.

11. Krime ofensa ba integridade fizika simples ho natureza violénsia doméstika

Nú. Prosesu : 0456/17.PDDIL
Kompozisaun Tribunál : Singulár
Juis : Dra. Fransisca Cabral
Prokuradór : Dr. Nelson de Carvalho
Defeza : Dr. Rui Guterres
Tipu pena : Pena multa US\$60.00

Iha 09 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu VdA hasoru nia feen, iha Distritu Dili.

Akuzasaun Prokuradór

Prokuradór akuza katak iha 15 Dezembru 2017, maizumenus iha tuku 12.00 kalan, arguidu ho kondisaun lanu, rasta no sama lezada nia kabun iha parte loos no lori kapasete baku dala rua iha lezada nia ulun.

Antes kazu ne'e akontese, arguidu no lezada fila hosi vizita família atu ba uma. Iha dalan arguidu diskonfia katak lezada tuir arte marsiais nune'e arguidu husu ba lezada. Maibé lezada hatan katak nia la tuir. Arguidu kontinua husu nune'e bainhira sira to'o iha uma lezada la tama uma laran tanba tauk arguidu. Depoisde hein durante tempu lubuk ida, arguidu sai ba buka lezada no hetan lezada iha mota ninin, nune'e arguidu komete krime refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu sira iha akuzasaun no deklara katak arrepende ninia hahalok. Arguidu mós deklara katak iha momentu akontesimentu ne'e nia lanu todan hela. Arguidu ho lezada mós diak malu ona to'o agora. Entretantu lezada kontinua konfirma faktu sira no deklara katak sira diak malu ona to'o agora.

Alegasaun final

Prokuradór konsidera arguidu komete duni krime hasoru lezada. Tribunál mós konsidera sirkunstánsia atenuante sirahanesan arguidu arrepende ona ninia hahalok no diak malu ona ho lezada. Maibé atu prevene arguidu la komete tan aktu ne'e hasoru lezada iha futuru, husu ba tribunál atu kondena arguidu ho pena prizaun maibé suspende ninia ezekusaun.

Entretantu, defeza husu ba tribunál atu kondena arguidu ho pena multa tanba arguidu konfesa, arrepende ninia hahalok no promete sei la komete tan krime hasoru lezada iha futuru. Aleinde ne'e, iha momentu kazu ne'e akontese arguidu lanu hela.

Desizaun

Tribunál konklui arguidu provadu komete krime hasoru lezada. Bazeia ba faktu provadu hirak ne'e, tribunál kondena arguidu ho pena multa US\$60.00 ne'ebé arguidu sei selu gradualmente US\$1.00 kada lora durante lora 60. Bainhira arguidu la selu pena multa ne'e, arguidu sei kumpri iha prizaun durante fulan rua nu'udar pena alternativa ba arguidu.

12. Krime ofensa ba integridade fizika simples ho natureza violénsia doméstika

Nú. Prosesu : 0545/17. DICMR
Kompozisaun Tribunál : Singulár
Juis : Dr. Euzébio Xavier Victor
Prokuradór : Dr. Bartolomeu de Araujo
Defeza : Dr. Sebastião Amado
Tipu pena : Pena admoestasaun

Iha 11 Jullu 2018, Tribunál Distritál Dili prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu EBL hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha 14 Outobru 2017, maizumenus iha tuku 21.00 kalan, arguidu tuku dala ida iha lezada nia kanuruk nune'e lezada halai. Bainhira lezada halai, arguidu foti fatuk tuda tuir lezada maibé la kona, nune'e arguidu tuda rahun janela vidru hamutuk lima, tuda rahun TV ida no ventuña ida. Antes kazu ne'e akontese, bainhira lezada fila hosi reza iha viziñu nia-uma, lezada hare arguidu toba hela tanba lanu. Hafoin lezada foti arguidu ninia HP no loke arguidu ninia Facebook (FB). Bainhira arguidu hakfodak no hader mai hare lezada loke hela ninia FB, sira diskute malu to'o mosu agresasaun hirak ne'e. Aktu ne'e rezulta moras iha lezada nia kanuruk no halo lezada trauma no laran moras.

Prokuradór akuza arguidu kontra artigu 145 KP kona-ba ofensa ba integridade fízika simples no artigu 2, 3(a), 35(b) no 36 LKVD ho moldura penál to'o tinan 3 ka multa, konjuga ho krime danu simpes iha artgiu 258 KP ho moldura penál tinan 3 prizaun ka multa.

Antes produsaun ba prova sira, tribunál halo tentativa konsiliaun ba krime danu simples. Lezada hakarak dada fila keixa kona-ba krime danu simples hasoru arguidu tanba arguidu arrepende ona ninia hahalok no troka foun ona sasan sira ne'ebé estragus. Tribunál depoisde konfirma ho prokuradór no defeza, omologa dezisténsia keixa hosi lezada.

Produsaun ba prova sira

Iha prosesu julgamentu, arguidu rekoñese katak arguidu lanu maibéla tuku lezada nia kanuruk. Arguidu mós deklara katak arrepende ba ninia hahalok no promete sei la halo tan krime ne'e iha futuro.

Aleinde ne'e, lezada deklara katak arguidu la tuku lezada maibé basa kois deit iha nia kanuruk. Lezada mós deklara katak sira diak malu depoisde liutiha lora ida no arguidu foin primeiravés komete krime hasoru nia.

Aleisaun finál

Prokuradór konsidera arguidu komete duni krime ofensa ba integridade fízika simples hasoru lezada mezmú arguidu nega katak nia la tuku maibé lezada deklara katak arguidu basa kois nia kanuruk. Tanba ne'e, depoisde konsidera sirkunstánsia atenuante sira hanesan arguidu arrepende ba nia hahalok, diak malu ona ho lezada no promete sei la halo tan iha futuro, husu ba tribunál atu aplika pena admoestasaun ba arguidu.

Entretantu defeza konsidera arguidu arguidu la tuku lezada nia kanuruk maske lezada dehan katak basa kois, nune'e husu ba tribunál atu absolve arguidu hosi krime ne'e.

Desizaun

Tribunál prova katak arguidu tuku kois duni lezada nia kanuruk. Bazeia ba faktu provadu hirak ne'e no sirkunstánsia atenuante sira hanesan arguidu konfesa faktu sira iha akuzasaun, arrepende ninia hahalok no diak malu ona ho lezada, tribunál kondena arguidu ho pena admoestasaun.

13. Krime ofensa ba integridade fízika simples natureza violénsia doméstika

Nú. Prosesu	: 0018/17.ALRMX
Kompozisaun Tribunál	: Singulár
Juis	: Dra. Maria Modesta
Prokuradór	: Dr. Nelson de Carvalho
Defeza	: Dr. Afonso Gomes
Tipu pena	: Pena prizaun fulan 3 suspende ba tinan 1

Iha 12 Jullu 2018, Tribunál Distritál Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Aileu.

Akuzasaun Prokuradór

Prokuradór akuza katak iha 18 Juñu 2017, tuku 08.00 dader, arguidu tuku dala tolu iha lezada nia ulun. Kazu ne'e akontese bainhira arguidu husu ba lezada kona-ba sira nia dokumentus rai nian maibé lezada hatan katak nia fó tiha ona ba arguidu nia-aman. Aktu ne'e rezulta lezada sofre moras no ba halo tratamentu iha postu saude.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun prokuradór nian no deklarara katak nia hirus tebes lezada tanba arguidu atu lori dokumentu rai nian ne'e ba iha xefi suku hodi asina. Aleinde ne'e, arguidu hirus tanba lezada fó dokumentus ne'e ba nia aman sein koñesimentu arguidu nian.

Entretantu lezada kontinua konfima faktu sira no mós konfirma ho arguidu nia deklarasaun katak nia fó dokumentu ba arguidu nia aman sein koñesimentu hosi arguidu. Lezada mós deklarara katak arguidu foin primeiravés komete krime hasoru lezada no problema ne'e sira rezolve ona tuir dalan familiar.

Alegasaun final

Iha prosesu julgamentu arguidu konfesa ba faktu sira hotu no konsidera katak arguidu nia intensaun diak tanba atu proteze dokumentu ne'e maibé arguidu ninia hahalok ne'e lei bandu.

Iha parte seluk, defeza husu ba tribunál atu aplika pena admoestasaun ba arguidu tanba arguidu konfesa, kolabora diak ho tribunál no foin primeiravés komete krime hasoru lezada.

Desizaun

Depoide avalia faktu sira ne'e, tribunál prova katak arguidu komete duni krime hasoru lezada. Bazeia ba prova ne'e, tribunál kondena arguidu ho pena prizaun fulan tolu suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu : 0066/17. DINFT
Kompozisaun Tribunál : Singulár
Juis : Dr. Antonio Helder do Carmo

Prokuradór : Dr. Bartolomeu de Araujo
Defeza : Dr. Ismail da Conceição
Tipu pena : Pena prizaun tinan 1 suspende ba tinan 2

Iha 13 Jullu 2018, Tribunál Distritál Dili prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida VC hasoru nia oan mane (JdC) ho idade tinan 13, iha Distritu Dili.

Akuzasaun Prokuradór

Prokuradór akuza arguidu katak iha 04 Maiu 2017, lezadu ba buka hena obralan iha Merkadu Taibesi no fila uma iha tuku 19.00 kalan. Lezadu dere odamatan uma nian maibé arguida la loke odamatan nune'e lezadu ba toba fali iha Merkadu Taibesi no foin fila ba uma iha dadersan, nune'e, arguida foti fiu baku dala barak iha lezadu nia isin lolon no lori katana nia ulun baku iha lezadu nia ulun. Aktu hirak-ne'e rezulta lezadu sofre bubu, mean no moras iha lezadu nia isin lolon.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Arguida la marka prezensa iha tribunál tanba tribunál la hatene nia paradeiru ikus, tanba tuir informasaun katak arguida halai ba hela tiha iha Oekusi.

Entretantu lezadu konfirma hotu faktu sira iha akuzasaun no deklarata katak arguida hasai lezadu hosi eskola no obriga lezadu faan mantolun-daan hodi sustenta família. Lezadu mós deklarata katak arguida sempre halo agresaun fizika hasoru nia no obriga lezadu han hotu mantolun restu kuandu la konsege faan hotu.

Testemuña AS nu'udar lezadu nia kolega nia inan konfirma faktu sira iha akuzasaun prokuradór nian no depoimenta katak nia mós rona informasaun hosi viziñu sira katak arguida ho nia laen halo agresaun dala barak hasoru lezadu no dala ida arguida tara lezadu mak foin baku.

Alegasaun finál

Prokuradór mantein faktu sira iha akuzasaun no husu ba tribunál atu kondena arguidu ho pena prizaun tinan ida suspende ba tinan ida. Entretantu defeza husu ba tribunál atu aplika pena ne'ebé apropiadu no justu ba arguida tanba tribunál la rona arguida nia deklarasaun.

Desizaun

Depoisde avalia faktu sira hotu, tribunál prova katak arguida komete duni krime tuir faktu iha akuzasaun prokuradór nian. Bazeia ba faktu provadu ne'e no tetu mós ba sirkunstánsia hotu-hotu, tribunál kondena arguida ho pena prizaun tinan ida suspende ba tinan rua.

15. Krime ofensa ba integridade fizika simples ho natureza violénsia doméstika

Nú. Prosesu : 0667/16.DICMR
Kompozisaun Tribunál : Singulár
Juis : Dr. Maria Solana
Prokuradór : Dr. Bartolomeu deAraujo
Defeza : Dr. Carlos Mendonça (advogadu privadu)
Tipu pena : Pena prizaun 1 suspende ba tinan 2

Iha 13 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu ES hasoru nia kuiñadu, iha Distritu Dili.

Akuzasaun Prokuradór

Prokuradór akuza katak iha 12 Novembru 2016, iha tuku 19.00 kalan, arguidu foti besi-kanu ida no baku dala ida iha lezadu nia ain-karuk, baku iha liman-kabun loos no kanotak parte loos no karuk. Aktu hirak ne'e, rezulta lezadu sofre bubu iha ain-tuur, kanotak sorin, ulun no ran sai barak iha liman-kabun loos. Antes kazu ne'e akontese, bainhira lezadu han hela iha uma laran no rona arguidu tolok lezadu nia feen (arguidu nia feton) no husu atu fó fila osan ne'ebé arguidu uza hodi selu nia alin ne'e nia eskola. Tanba ne'e, lezadu hamrik ba besik lezadu nia feen no dada tama ba kuartu-laran. Arguidu sai ba uma li'ur foti besi kanu ida no halo agresaun hasoru lezadu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu rekoñese katak nia foti duni besi-kanu no baku lezadu maibé la kona nokona fali kadeira masa. Hafoin ne'e, viziñu sira hadau kedas besi-kanu ne'e hosi arguidu. Arguidu mós deklara katak depoisde problema ne'e, arguidu ho lezadu la hela hamutuk ona.

Enkuantu lezadu konfirma ba faktu sira iha akuzasaun no deklara katak arguidu nia hahalok ne'e halo lezadu ba servisu uza ai-tonka durante semana rua nia laran.

Iha parte seluk, testemuña PM ne'ebé hela hamutuk ho arguidu no lezadu, depoimenta katak iha momentu ne'ebá, arguidu tolok duni lezadu nia feen no foti besi-kanu baku lezadu. Testemuña depoimenta mós katak bainhira arguidu sai ba foti besi-kanu, lezadu mós tama ba kuartu-laran

foti katana hosi kuartu-laran, maibé bainhira lezadu sai mai haree arguidu kaer ona besi-kanu, lezadu tau tuun tiha katana no foti fali kadeira hodi sata-an hosi besi-kanu ne'ebé arguidu uza hodi baku lezadu. Nune'e, besi-kanu refere la kona lezadu nia isin-lolon.

Alegasaun final

Prokuradór konsidera arguidu provadu komete faktu sira iha akuzasaun no husu ba tribunál atu kondena arguidu ho pena ne'ebé adekua. Enkuantu defeza, husu ba tribunál atu kondena arguidu ho pena ne'ebé kmaan tanba konsidera sirkunstánsia atenuante sira hanesan arguidu arrepende no di'ak malu ona ho lezadu maske agora dadaun la hela hamutuk ona.

Desizaun

Tribunál konklui katak faktu sira iha akuzasaun provadu hotu. Bazeia ba faktu provadu hirak ne'e, tribunál kondena arguidu ho pena prizaun tinan ida suspende ba tinan rua.

16. Krime pekulatu no administrasaun danoza

Nú. Prosesu : 0021/15.PGGCC
Kompozisaun Tribunál : Koletivu
Juis : Dr. Jose Maria, Maria Solana, Dr. Ivan Gonçalves no Dra. Albertina das Neves
Prokuradór : Dr. Rogerio Viegas
Defeza : Dr. Rui Guterres no Dra. Adelina Mistíca (advogada privada)
Tipu pena : Pena prizaun tinan 5 ba arguidu Fransisco no pena prizaun tinan 2 fulan 6 suspende tinan 3 ba arguidu Luis no indemnizasaun sivíl ba kada arguidu⁴

Iha 16 Jullu 2018, Tribunál Distritál Dili prezide julgamentu leitura sentensa ba krime pekulatu no administrasaun danoza ne'ebé envolve arguidu Luis de Fátima no Francisco Pereira do Rego hasoru Estadu liuhosi Dirasaun Reseitas iha HNGV, iha Distritu Dili.

Akuzasaun Prokuradór

Prokuradór akuza katak iha 2014, arguidu Luis de Fátima nu'udar tezoreiru iha Reseitas HNGV no arguidu Francisco Pereira do Rego nu'udar administradór iha HNGV, sira utiliza osan kobransa ba reseita iha ospital ba interese privadu. Reseita hirak ne'e mai hosi kobransa ba Sala Infermaria Espesial/VIP, Radiolojia, médiku akupuntur, laboratóriu nasonal saúde, jenokolójia no obstetrisia no aluga sala loke kantina HNGV.

⁴ Defeza sei halo rekursu ba kazu ne'e tanba lakonkorda ho sentensa no valor indemnizasaun ba arguidu Francisco do Rego.

Iha tinan 2014 refere, HNGV hetan rendimentu hosi reseita hirak ne'e hamutuk US\$99.905. Reseita hirak ne'e tuir Dekretu Lei nú.01/2014 kona-ba reseitas, katak tenke depozita ba konta bankária estadu nian no halo relatóriu depoisde loron sanulu resin lima. Maibé, hosi total reseita sira hamutuk US\$99.905, arguidu Luis de Fátima depozita de'it US\$24.900 ba iha konta bankária estadu nian no montante US\$75.405.35 maka arguidu la depozita.

Osan ne'ebé la depozita, arguidu Luis de Fátima uza hodi fó impresta fali ba iha funsionáriu HNGV no la halo lista ba ema sira ne'ebe impresta ne'e. Tanba ne'e, arguidu la hanoin hetan identidade hosi ema sira ne'e. Arguidu so lembra de'it fó impresta ba arguidu Françisco do Rego US\$12.000 no osan ne'ebé nia uza ba interese privadu.

Prokuradór deskobre mós katak arguidu Françisco do Rego iha interese antes ona atu aproveita reseita hirak ne'e, liuhosi koloka arguidu Luis de Fátima ne'ebé ho idade avansadu no laiha kapasidade atu halo relatóriu sein uza komputadór.

Arguidu nain rua viola ona artigu 14 hosi Lei nú.13/2009 kona-ba Lei Orsamentu no Jestaun ba Finanseiru no Dekretu Lei nú.01/2014 kona-ba reseitas nian.

Prokuradór akuza arguidu nain rua kontra artigu 295 KP kona-ba pekulatu no kontra artigu 274 KP kona-ba administrasaun danoza.

Produsaun ba prova sira

Iha prosesu julgamentu, arguidu Luis de Fátima rekoñese katak nia la depozita duni osan US\$75.405.35 no fó impresta ba funsionáriu HNGV. Arguidu deklara katak nia la hanoin hetan identidade hosi ema sira ne'ebé impresta tanba nia nunca halo lista. Arguidu lembra de'it fó impresta ba arguidu Françisco do Rego US\$12.000 no osan ne'ebé arguidu uza ba nia interese privadu.

Entretantu arguidu Françisco do Rego rekoñese nia impresta duni osan US\$12.000 hosi "Patty Cash" ho razaun atu sosa nesiedade HNGV nian, maibé realidade utiliza de'it US\$4.449 ba nesiedade ospital nian no restu arguidu uza ba nia interese rasik.

Alegasaun final

Prokuradór konsidera faktu hotu provadu, katak arguidu sira halo konspirasaun hodi aproveita foti reseita estadu nian hodi fó vantazen ba sira nia-an. Argudu sira mós hatene katak tuir Lei Jestaun Fnanseira bandu atu utiliza reseitas ba iha gastu anuál nian.

Prokuradór husu ba tribunál atu kondena arguidu Luis de Fátima ho pena prizaun tinan 2 fulan 6 suspende ba tinan 3 no indemnizasaun sivil US\$600.00 hosi US\$2,000.00 tanba arguidu fó fila ona US\$1,400.00.

Prokuradór deskobre mós katak arguidu Francisco do Rego aproveita arguidu Luis de Fátima ne'ebé ho idade avansadu no laiha kapasidade atu halo relatóriu sein uza komputadór.

Tanba ne'e, prokuradór husu ba tribunál atu kondena arguidu Francisco do Rego ho pena prizaun tinan 5 no husuindemniza ba tribunál US\$38.000 ba estadu.

Enkuantu, defeza husu ba tribunál atu absolve arguidu Francisco do Rego hosi krime pekulatu tanba konsidera nia kliente tenki hola sasan ospital ne'ebé ho karakter urjensia, hanesan mina ba jeradores. Tanba tuir defeza, se arguidu la hola lalais konzela sei aat no fó impaktu ba raan no ema sira ne'ebé uza oksijensia sei iha risku nia laran. Tuir defeza, krime pekulatu bele konsidera bainhira arguidu hetan vantazen hosi osan ne'ebe nia utiliza. Maibé realidade osan sira ne'e nia uza ba nesesidade ospital nian ne'ebé ho karakter urjente no iha situasaun orsamentu ba fundu sira ne'e laiha ona.

Enkuantu ba krime administrasaun danoza, defeza husu ba tribunál atu fó pena ne'ebé kmaan tanba infrasaun sira ne'e mosu haree mós ba responsabilidade ne'ebé arguidu eleva.

Iha parte seluk, defeza husu ba tribunál atu fó pena ne'ebé kmaan ba arguidu Luis Fátima tanba arguidu devolve ona osan balun ba estadu liuhosi Ministériu Públiku.

Desizaun

Depoide avalia faktu sira hotu, tribunál konsidera faktu sira hotu provadu. Tribunál mós konsidera katak arguidu na'in rua konspira hamutuk atu deposita deit reseitas ospital nian balun ba kofre estadu no seluk uza ba interese privadu.

Tribunál mós deskobre mós katak, arguidu Francisco do Rego nu'udar administradór iha HNGV iha interese antes ona atu aproveita reseita hirak ne'e, liuhosi koloka arguidu Luis de Fátima ne'ebé ho idade avansadu no laiha kapasidade atu halo relatóriu sein uza komputadór.

Arguidu nain rua hatene katak orsamentu mai hosi reseitas tenke depozita ba konta bankária Estadu, ho nune'e arguidu sira viola ona artigu 14 hosi Lei nú. 13/2009 kona-ba Orsamentu no Jestaun ba Finanseiru no Dekretu Lei Nú. 01/2014 kona-ba reseitas nian.

Tribunál konklui prosesu ne'e hodi kondena arguidu Francisco Pereira ho pena prizaun tinan 5 no indemnizasaun sivíl US\$38.000. Enkuantu arguidu Luis de Fátima, tribunál kondena ho pena prizaun tinan tinan 2 fulan 6 suspende ba tinan 3 no indemnizasaun sivíl US\$2.000 maibé tanba devolve antes ona US\$1.600 entaun tenki intrega hikas US\$400.

17. Krime ofensa ba integridade física simples

Nú. Prosesu : 0219/16.PDDIL
Kompozisaun Tribunál : Singulár
Juis : Dra. Jumiaty Maria Freitas

Prokuradór : Dr. Nelson de Carvalho
Defeza : Dr. Sebastião Amado de Almeida
Tipu pena : Absolve

Iha 17 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ne'ebé envolve arguidu Fransisco da Costa hasoru lezadu Moises Fernandes, iha Distritu Dili.

Akuzasaun Prokuradór

Prokuradór akuza katak iha 27 April 2016, maizumenus tuku 13.00 meudia, arguidu tuku dala ida iha lezadu ninia reen-toos no rezulta bubu no ran sai barak.

Antes kazu ne'e akontese, lezadu ho arguidu ba iha eskuadra PNTL Kaikoli hodi rezolve problema entre lezadu no arguidu ninia alin feto. Arguidu ba ho ema barak no bainhira to'o iha ne'ebá arguidu hateten ba lezadu katak lezadu demais liu ona no halo agresun hirak-ne'e hasoru lezadu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu rekoñese katak nia ba duni iha eskuadra PNTL maibé ba ho deit nia kondutór no la tuku lezadu. Arguidu mós deklara katak nia ba lalais deit tanba besik atu tama servisu. Iha kalan, nia hakfodak bainhira hare notisia iha TV ne'ebé fó sai katak lezadu hetan tuku iha reen-toos to'o ran.

Entretantu, lezadu kontinua konfirma faktu sira iha akuzasaun no deklara katak nia laiha problema ho arguidu maibé iha problema ho arguidu ninia feton ne'ebé mak sira hela besik malu.

Testemuña AD nu'udar lezadu ninia feen deklara katak arguidu hamrik besik lezadu maibé nia la hare ho matan se mak tuku lezadu tanba iha momentu ne'ebá ema barak no estrundu makaas. Testemuña hakfodak bainhira hare lezadu nia ulun ran ona.

Alegasaun final

Prokuradór husu ba tribunál atu kondena arguidu tuir konviksaun tribunál ninian tanba arguidu nega faktu katak la tuku lezadu, la ba eskuadra polisia ho ema barak. Aleinde ne'e, testemuña ne'ebé nu'udar lezadu nia feen la hare ho matan se mak tuku lezadu.

Entretantu defeza husu ba tribunál atu absolve arguidu husi krime ne'e tanba arguidu nega faktu katak nia la tuku lezadu no reforsa ho testemuña nu'udar lezadu nia feen katak la hare ho matan se mak tuku lezadu.

Desizaun

Depoísde avalia faktu sira hotu, tribunál absolve arguidu hosi akuzasaun prokuradór nian tanba arguidu la prova komete krime hasoru lezadu.

18. Krime ofensa ba integridade física simples

Nú. Prosesu : 0267/17.DICMR
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Bartolomeu de Araujo
Defeza : Dr. Humberto Alves
Tipu pena : Omologa ba dezisténsia keixa

Iha 18 Jullu 2018, Tribunál Distritál Dili, prezide julgamentu ba krime ofensa ba integridade física simples ne'ebé envolve arguidu Jeronimo Henriques hasoru nia viziña Anita Amaral, iha Distritu Dili⁵.

Produsan ba prova sira

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliausaun, juis husu atu halo tentativa konsiliausaun ba arguidu no lezada.

Iha prosesu konsiliausaun ne'e, lezada hakarak dada fali nia-keixa tanba arguidu husu diskulpa ba lezada.

Alegasaun final

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu dame hosi parte sira, tribunál konklui prosesu ne'e no omologa akordu dame entre parte sira.

19. Krime abuzu seksuál ba menor

Nú. Prosesu : 0101/17.PDDIL
Kompozisaun Tribunál : Koletivu
Juis : Dr. Euzébio Xavier Victor, Dra. Ana Paula Fonseca no Dra. Jacinta Correia
Prokuradór : Dr. António Tavarres
Defeza : Dr. Manuel Lito Exposto
Tipu pena : Absolve

⁵Tribunál la lee sai akuzasaun prokuradór nian

Iha 18 Jullu 2018, Tribunál Distritál Dili prezide leitura ba krime abuzu seksuál ba menórne'ebé envolve arguidu SdS hasoru lezada JC, iha Distritu Dili.

Akuzasaun Prokuradór

Prokuradór akuza katak iha Janeiru 2017, arguidu koñese malu ho lezada no troka númeru telefone ba malu. Iha 18 Marsu 2017, maizumenus tuku 23.00 kalan, arguidu telefone ba lezada no haruka lezada tun ba hasoru arguidu tanba arguidu saudades loos lezada. Maibé lezada hatan ba arguidu katak nia labele ba hasoru arguidu tanba kalan ona. Arguidu husu fali lezada katak “ita rua namora malu mak hanesan ne'e fali ka?”

Tanba arguidu koalia hanesan, lezada foti nia motor bit ba kedas iha arguidu nia hela fatin ne'ebé la dook-malu hosi lezada. Arguidu hamrik ona iha nia uma oin nune'e bainhira lezada to'o iha arguidu nia uma oin, sira konsege hamrik hamutuk iha menu balun. Arguidu no lezada tama ba arguidu nia kuartu-laran tanba arguidu dehan ba lezada katak tauk viziñu hare. Lezada lakohi tama ba arguidu nia kuartu-laran maibe arguidu hamaus lezada ho liafuan oioin, nune'e lezada tuir arguidu ba nia kuartu laran.

Iha kuartu laran, arguidu koalia liafuan domin ba lezada, hakbesik-an ba lezada, no ho obriga latan lezada ba kama-laran. Hafoin arguidu hasai lezada nia ropa no halo relasaun seksuál ho lezada.

Iha 20 Marsu 2017, maizumenus tuku 23.00 kalan, arguidu kontaktu tan lezada liuhosi telefone no haruka lezada ba hasoru nia. Arguidu mós dehan ba lezada katak se lezada la hasoru nia, arguidu sei hein iha dalan tanba antes ne'e, sira halo ona relasaun seksuál. Nune'e, lezada obrigan ba hasoru arguidu iha arguidu nia uma. Arguidu loke odamatan no haruka lezada tama ba arguidu nia kuartu-laran. Iha kuartu-laran ne'e, arguidu husu ba lezada atu halo relasaun seksuál. Maibé lezada rejeita tanba lezada sei menstrusaun hela.

Prokuradór akuza katak lezada lakohi halo kualkér aktu seksuál ho arguidu, maibé arguidu aproveita lezada ne'ebé sei idade kiik. Momentu akontesimentu lezada seidakompleta tinan 14.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál hosi tinan 5 to'o tinan 15 prizaun.

Produsaun ba prova sira

Iha prosesu julgamentu, arguidu rejeita totalmente faktu sira iha akuzasaun. Arguidu deklarata katak iha loron 21 Marsu 2017 iha oras madrugada, arguidu rona feto ida nia lian (lezada) katak “ajuda lai, ha'u atu mate ona”. Tanba arguidu hanoin nia prima sira nune'e, arguidu loke nia

odamatan no derepente lezada halai tama kedas ba arguidu nia uma-laran no subar iha arguidu nia kama okos.

Arguidu iha hela konfuzaun laran ba hamrik iha uma oin no hare lezada nia família hateke tun hela ba kraik. Arguidu ba fali iha lezada no husu lezada tauk sé?. La kleur, lezada nia família sira ba iha arguidu nia uma no baku arguidu to'o ran.

Iha momentu ne'ebá, arguidu no lezada nia família lori sira na'in rua ba iha lezada nia uma mak hare katak lezada nia kondisaun sutian talin kotu, kalsa oin la taka, no bluza tau fila (liur ba fali laran no laran mai fali liur).

Entretantu, lezada kontinua konfirma faktu hosi akuzasaun prokuradór nian no deklarata katak arguidu no lezada namora hahu hosi Janeiru 2017, no depoisde fulan rua akontese problema ne'e.

Testemuña BG nu'udar lezada nia primu depoimenta katak loos duni iha 20 de Marsu 2017, iha tuku 11.00 kalan bainhira testemuña atu ba toba, testemuña hare ahi iha lezada nia uma sei lakan. Tanba ne'e, atu kumpri lia menon hosi lezada nia inan ne'ebé haruka testemuña atu tau-matan hela ba lezada no lezada nia aman ne'ebé moras troke. Ne'e-duni, testemuña tama ba lezada nia uma laran atu taka ahi inklui aproveita hare lezada sira. Maibé bainhira nia ba pasa-revista ba kuartu-laran, testemuña hare deit lezada nia aman no lezada nia alin mane ho tinan lima toba mesak iha kuartu laran n testemuña la hare hetan lezada iha nia kuartu-laran.

Testemuña fanun kedas lezada nia maun-boot no testemuña nia bin hodi buka lezada iha bairo laran maibé buka la hetan. Aleinde ne'e, lezada nia telefone mate no iha momentu ne'ebá besik tuku 02.00 madurgada ona. Depoisde liutiha oras ida, testemuña koko telefone tan lezada no konsege tama. Testemuña husu lezada iha ne'ebé no lezada hatan katak nia iha kolega nia uma no dehan katak nia atu fila ona.

Maibé tanba hein kleur, lezada la fila, testemuña komesa la'o tun no hamrik iha arguidu nia uma oin hodi hare tun ba estrada kraik. Testemuña mós konsege hare arguidu loke nia odamatan maibé taka lalais fali. Hosi ida-ne'e, testemuña komesa deskonfia no la'o neneik ba iha arguidu nia uma. La kleur testemuña rona lian feto no mane ida diskute malu no testemuña rona lezada nia lian.

Testemuña fila no ba fõ hatene lezada nia maun no sira ba fali iha arguidu nia uma no tuku odamatan hodi husu lezada. Maibé arguidu hatan katak lezada laiha. Testemuña ho lezada nia maun la fiar no obriga loke odamatan no hare lezada iha hela arguidu nia kama okos. Testemuña sira lori lezada no arguidu ba iha lezada nia uma no hare katak lezada nia sutian kotu, no kalsa nakloke.

Entretantu, Dr. Edegar Da Costa Soares nu'udar doutór iha HNGV depoimenta katak bazeia ba relatóriu médiku hosi Pradet, hatudu katak lezada sofre duni kanek maibé kanek tuan. Aleinde ne'e, doutór ne'e mós duvida ho relatóriu Pradet nian ne'ebé la esplika detallu kona-ba kondisaun lezada nian iha relatóriu ne'e.

Alegasaun final

Prokuradór husu ba tribunál atu fó justisa ne'ebé justu ba arguidu tanba lezada nia família sira hetan lezada iha arguidu nia kama-okos maske arguidu nega totalmente faktu sira hotu no relatóriu Pradet la esplika klaru kona-ba lezada nia estadu médiku.

Iha parte seluk, defeza husu ba tribunál atu absolve arguidu tanba arguidu rejeita totalmente ba faktu sira ne'e akuza hasoru nia. Arguidu mós deklara katak nia rasik sai vítima iha akontesimentu ne'e tanba lezada nia maun no primu sira baku nia to'o ran sein husu. Aleinde ne'e, arguidu mós lakon ninia sasan balun.

Desizaun

Depoizde avalia faktu sira hotu, tribunál absolve arguidu hosi akuzasaun prokuradór nian tanba arguidu la provadu iha relasaun namora ho lezada no la prova halo relasaun seksuál ho lezada maske lezada iha duni arguidu nia kama okos.

20. Krime ofensa ba integridade física simples ho natureza violéncia doméstika no ameasa

Nú. Prosesu	: 0140/18 PDDIL
Kompozisaun Tribunál	: Singulár
Juis	: Dra. Edite Palmira
Prokuradór	: Dr. Nelson de Carvalho
Defeza	: Dr. Jonas Henrique da Costa
Tipu pena	: Pena prizaun fulan 5 suspende tinan 1 no pena multa US\$60.00

Iha 18 Jullu 2018, Tribunál Distritál Dili prezide julgamentu leitura sentensa ba krime ofensa ba integridade física simples no ameasa ne'ebé envolve arguidu JdS (ajente PNTL) hasoru nia feen, iha Distritu Dili.

Akuzasaun Prokuradór

Prokuradór akuza arguidu katak iha data ne'ebé la lembra maibé iha Dezembru 2017, iha tuku 20.00 kalan, arguidu ho lezada diskute malu kona-ba osan atu selu sira nia oan nia eskola. Arguidu tata lezada nia hasan karuk no tuku dala ida iha lezada nia kanuruk. Aktu ne'e, rezulta lezada sofre bubu no moras iha lezada nia hasan parte karuk no kanuruk.

Tuir fali, iha 07 Abril 2018, arguidu haruka SMS ameasa ba lezada katak atu baku dolar tiha lezada no tiru mate lezada tanba lezada atu ba lees arguidu nia feen kiik. Arguidu haruka mensajen ne'e wainhira arguidu husik tiha ona lezada no hola ona fetu kiik.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no kontra artigu 157 KP kona-ba krime ameasa ho moldura penál to'o tinan 1 prizaun ka multa.

Antes halo produsaun ba prova sira tribunál halo tentativa konsiliaun ba krime ameasa maibé lezada lakohi konsilia no hakarak atu kontinua ba julgamentu.

Produsaun ba prova sira

Iha prosesu julgamentu, arguidu deklara katak nia la tata no la tuku lezada maibé dudu deit lezada tanba lezada tolok arguidu. Arguidu mós deklara katak nia la SMS ba lezada hodi ameasa atu baku dolar no tiru mate lezada.

Entretantu lezada konfirma faktu sira katak arguidu tata no tuku lezada nia kanuruk. Maibé kona-ba mensajen ameasa ne'e, lezada deklara katak nia foin deskonfia arguidu mak haruka tanba númeru telefone ne'ebé uza hodi ameasa ne'e, antes ne'e arguidu uza dala ida hodi telefone lezada. Aleinde ne'e lezada laiha problema ho ema seluk.

Alegasaun finál

Prokuradór konsidera arguidu provadu tata lezada nia hasan karuk no tuku dala ida iha lezada nia kanuruk inklui ameasa lezada liuhosi telefone. Nune'e, husu ba tribunál atu aplika pena ne'ebé justu no adekuadu ba arguidu. Aleinde ne'e, husu ba tribunál atu arguidu kontinua fó alimentu ba iha nia oan tanba agora dadaun oan sira hela ho lezada.

Entretantu defeza husu ba tribunál atu absolve arguidu hosi krime ne'e tanba deklarasaun hosi arguidu no lezada kontráriu ba malu no hamosu dúvida ba defeza.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova hirak ne'e, tribunál konklui prosesu no kondena arguidu ho pena prizaun fulan lima suspende ba tinan ida ba krime ofensa ba integridade fízika simples. Entretantu ba krime ameasa, tribunál, kondena arguidu ho pena multa US\$60.00 ne'ebé kada loraun arguidu sei selu US\$1.00 durante loraun 60. Tribunál mós kondena arguidu selu kustu judisiál US\$40.00. Bainhira arguidu la selu pena multa ne'e, arguidu sei kumpri fulan ida iha prizaun nu'udar pena alternativa.

21. Krime ofensa ba integridade fízika simples ho natureza violénsia doméstika

Nú. Prosesu : 0046/18.DICMR
Kompozisaun Tribunál : Singulár
Juis : Dra. Jumiaty Maria Freitas
Prokuradór : Dr. Osorio de Deus
Defeza : Dra. Marcia Sarmento
Tipu pena : Pena prizaun fulan 6 suspende ba tinan 1

Iha 18 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BdS hasoru nia eis-feen, iha Distritu Dili.

Akuzasaun Prokuradór

Prokuradór akuza katak iha 26 Janeiro 2018, maizumenus tuku 11.00 dader, arguidu ba buka lezada iha Eskola Enfermeira Komoro nian tanba lezada fa'an sasan iha eskola refere. Arguidu kaer lezada ninia liman karuk no hanehan lezada nia ulun. Arguidu basa dala rua iha lezada nia kanuruk halo lezada oin nakukun. Lezada nia kolega feto mak ajuda lori lezada tama iha sala laran. Aktu sira ne'e rezulta lezada sofre moras iha lezada ninia-kanuruk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok ne'e. Arguidu mós deklarata katak nia ba buka lezada tanba rona informasaun hosi lezada nia maun katak lezada hola ona mane seluk. Entretantu, lezada kontinua konfirma faktu sira iha akuzasaun no deklarata katak nia hola mane seluk tanba durante arguidu servisu iha Baucau, arguidu nunka fó osan ba lezada.

Alegasaun final

Prokuradór mantein faktu sira iha akuzasaun no husu ba tribunál atu kondena arguidu ho pena prizaun fulan neen suspende ba tinan ida. Prokuradór husu pena ne'e atu prevene arguidu la repete krime hanesan iha futuru.

Entretantu defeza husu ba tribunál atu aplika pena multa ba arguidu tanba arguidu konfesa faktu sira iha akuzasaun no deklarata katak sira separa ona nu'udar feen no laen.

Desizaun

Depoizde avalia faktu sira ne'ebé prodús durante julgamentu, tribunál prova katak arguidu kaer lezada nia liman, hanehan lezada ninia ulun no basa dala rua iha lezada nia kanuruk. Bazeia ba faktu provadu hirak-ne'e no konsidera mós ba sirkunstánsia asosiadu sira hotu, tribunál kondena arguidu ho pena prizaun fulan neen suspende ba tinan ida.

22. Krime ofensa ba integridade fízika simples natureza violénsia doméstika no danu simples

Nú. Prosesu : 0176.DIBCR
Kompozisaun Tribunál : Singulár
Juis : Dr. Antonio Helder Viana do Carmo
Prokuradór : Dr. Bartolomeu de Araujo
Defeza : Dra. Laura Lay
Tipu pena : Pena admoestasaun

Iha 19 Jullu 2018, Tribunál Distritál Dili prezide prosesu julgamentu leitura sentensa ba krime ofensa ba integridade fízika simples ho natureza violénsia doméstika no danu simples ne'ebé envolve arguida DM hasoru nia laen, iha Distritu Dili.

Akuzasaun Prokuradór

Prokuradór akuza katak iha 14 Setembru Jullu 2017, maizumenus iha tuku 07.00 dader, arguida hadau tiha lezadu nia telefone no baku ba parede rezulta telefone nia vidru nakfera. Arguida foti mós ai ida baku ba iha lezadu nia motor (Meo Sport) maibé la konsege baku tanba lezadu kaer tiha arguida ninia liman. Arguida lees lezadu nia liman loos to'o hetan kanek. Arguida kontinua foti aisar no uza aisar nia kain baku lezadu nia motor to'o masa kotuk rahun. Arguida foti buli bee manas nian baku tan ba lezadu nia motor to'o buli rahun. Antes kazu ne'e akontese, arguida hare fotografia fetu ida iha lezadu nia telefone laran. Arguida husu kona-ba fetu ne'e ba lezadu maibé lezadu la hatan, nune'e mosu agresan hirak-ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga artigu 2, 3(a), 35(b) no 36 LKVD no kontra danu simples ho moldura penál to'o tinan 3 ka multa.

Produsaun ba prova sira

Iha prosesu julgamentu, arguida konfesa totalmente ba faktu sira hotu no deklarata katak nia arrepende ninia hahalok. Arguida mós promete sei la halo tan hahalok hanesan ne'e iha futuru no deklarata katak sira diak malu ona.

Entretantu lezadu la marka prezensa iha tribunál tanba agora dadaun lezadu ba vizita nia família iha Portugal no prokuradór husu ba tribunál atu la presiza rona lezadu nia deklarasaun.

Alegasaun finál

Prokuradór mantein faktu sira iha akuzasaun, tanba ne'e maske arguida arrepende no kolabora ho tribunál, husu ba tribunál atu kondena arguida ho pena prizaun maibé suspende ninia ezekusaun. Enkuantu kona-ba krime danu, tribunál deside atu hein lezadu nia prezensa.

Enkuantu, defeza husu ba tribunál atu kondena arguida ho pena ne'ebé kmaan tanba arguida konfesa, arrepende ninia hahalok no promete sei la halo tan hahalok hanesan ne'e iha futuru. Arguida mós iha oan nain nain haat ne'ebé presiza arguida atu tau matan.

Desizaun

Depoizde avalia faktu sira ne'ebé prodúsdurante julgamentu, tribunál prova katak arguida komete duni krime tuir faktu sira iha akuzasaun. Bazeia ba faktu provadu hirak ne'e, tribunál kondena arguidu ho pena admoestasaun.

23. Krime ofensa ba integridade fízika simples natureza violénsia doméstika

Nú. Prosesu : 0005/17.ALLQD
Kompozisaun Tribunál : Singulár
Juis : Dra. Jumiaty Maria Freitas
Prokuradór : Dr. Bartolomeu de Araujo
Defeza : Dr. Jose da Silva
Tipu pena : Pena prizaun fulan 6 suspende ba tinan 1 fulan 6

Iha 19 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VVN hasoru nia feen, iha Distritu Aileu.

Akuzasaun Prokuradór

Prokuradór akuza katak iha 22 Jullu 2017, maizumenus iha tuku 16.00 lokraik, arguidu no lezada diskute malu. Arguidu haruka lezada nonok maibé lezada lakohi nonok. Arguidu trata lezada ho liafuan mal no haruka lezada buka arguidu nia sepatu botas, maibé lezada lakohi nune'e arguidu tuku dala tolu iha lezada nia tilun-hun karuk, tuku dala ida iha reen-toos, tuku dala ida iha hasan loos no tuku dala ida iha ulun. Aktu sira ne'e rezulta lezada sofre kanek iha reen-toos no moras iha tilun no ulun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu no deklara katak arrepende ninia hahalok no diak malu ona ho lezada. Arguidu mós promete sei la repete hahalok ne'e iha futuru.

Aleinde ne'e, lezada kontinua konfirma faktu sira iha akuzasaun no deklara katak diak malu ona ho arguidu. Lezada mós deklara katak arguidu mak sustenta sira nia moris.

Alegasaun final

Prokuradór mantein nia akuzasaun, tanba ne'e maske arguidu arrepende no kolabora ho tribunál, husu ba tribunál atu kondena arguidu ho pena prizaun suspende ninia ezekusaun. Enkuantu, defeza husu ba tribunál atu kondena arguidu ho pena ne'ebé kmaan tanba arguidu konfesa, arrepende ninia hahalok no promete sei la halo tan hahalok ne'e iha futuru.

Desizaun

Depoizde avalia faktu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu hirak-ne'e, tribunál kondena arguidu ho pena prizaun fulan neen suspende ba tinan ida fulan neen.

24. Krime ofensa ba integridade física simples natureza violência doméstica

Nú. Prosesu : 0060/18.DIBCR
Kompozisaun Tribunál : Singulár
Juis : Dr. Antonio Helder
Prokuradór : Dr. Bartolomeu de Araujo
Defeza : Dra. Olga Barreto
Tipu pena : Pena prizaun fulan 6 suspende ba tinan 2 ho regra ba konduta

Iha 27 Jullu 2018, Tribunal Distrital Dili prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu AHH hasoru nia feen, iha Distritu Dili.

Akuzasaun Prokuradór

Prokuradór akuza katak lezada no arguidu hela separa ona, nune'e iha 24 Marsu 2018, tuku 00.00 kalan, arguidu ba hare sira nia oan sira ne'ebé hela ho lezada no lezada nia inan. Bainhira ba ne'e, arguidu lori mos *nasi bungkus* rua no serveza lata rua atu fó ba lezada nia inan.

Depoizde entrega tiha *nasi bungkus* ba lezada nia inan, arguidu sai ba liur no trata lezada ho liafuan ne'ebé hatun lezada nia dignidade. Tanba ne'e arguidu no lezada diskute malu no arguidu lori tua fakar ba lezada nia leten, basa dala rua iha lezada nia hasan karuk no tebe dala rua iha lezada nia kidan karuk. Aktu hirak-ne'e, rezulta lezada sofre moras iha fatin ne'ebé hetan agresan no lezada ba halo tratamentu iha Pradet.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu rejeita tebe lezada maibé rekoñese katak nia basa duni lezada dala ida tanba lezada lori kanuru suru rai-henek baku arguidu maibé arguidu satan netik ho nia liman.

Kona-ba serveza, arguidu deklara katak la'os nia mak fakar ba lezada nia isin maibé bainhira arguidu no lezada hadau malu mak serveza fakar ba sira na'in rua. Arguidu mós deklara katak nia sempre ba hare sira nia oan no nia banin fetu.

Entretantu lezada deklara katak arguidu ba nia uma ho kondisaun lanu nune'e lezada haruka arguidu fila ona ba arguidu nia uma maibé arguidu lakohi fila no kontinua lori *nasi bungkus* fó ba lezada nia inan. Aleinde ne'e, lezada deklara katak iha momentu ne'ebá arguidu trata aat lezada tanba diskonfia lezada ho mane seluk. Tanba moe ho liafuan trata hirak ne'e, lezada foti kanuru suru rai-henek hodi duni arguidu.

Testemuña ne'ebé nu'udar lezada nia inan depoimenta katak arguidu ba sira nia uma iha tuku 01.00 madrugada. Arguidu lori duni *nasi bungkus* no serveza kalen rua fó ba testemuña no husu nia oan sira toba ona ka seidak. Bainhira arguidu sae kareta atu fila, testemuña rona arguidu trata lezada, nune'e lezada lori kanuru suru rai-henek baku ba kareta maibé la konsege kona tanba arguidu tahan no kaer metin tiha kanuru ne'e. Testemuña mós depoimenta katak arguidu basa dala rua ba lezada nia hasan no tebe dala rua iha lezada nia kidan.

Alegasaun final

Prokuradór husu ba tribunál atu kondena arguidu ho pena prizaun fulan ida suspende ba tinan ida. Tanba konsidera katak arguidu ba lezada nia uma iha kalan-boot, trata lezada no komete duni krime hasoru lezada hanesan haktuir iha akuzasaun.

Enkuantu defeza husu tribunál fó justisa ida ne'ebé justu ba arguidu tanba arguidu konfesa ninia hahalok. Aleinde ne'e defeza argumenta katak arguidu komete krime ne'e hasoru lezada tanba lezada dala barak halo agresaun hasoru arguidu.

Desizaun

Depois avalia faktu sira ne'ebé prodús iha julgamentu, tribunál prova katak arguidu komete duni krime hasoru lezada. Bazeia ba prova sira ne'e, tribunál kondena arguidu ho pena prizaun fulan neen suspende ba tinan rua no kondena arguidu apresenta-an periodikamente fulan ida dala ida durante fulan tolu iha tribunál. Aleinde ne'e, tribunál kondena arguidu selu kustu judisiál US\$20.00.

25. Krime ofensa ba integridade fizika simples ho natureza violénsia doméstika no ameasa

Nú. Prosesu

: 0118/18.DICMR

Kompozisaun Tribunál : Singulár
Juis : Dr. Maria Solana
Prokuradór : Dr. Nelson Carvalho
Defeza : Dra. Joana Cristina
Tipu pena : Pena prizaun tinan 1 suspende tinan 2

Iha 28 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu IL hasoru nia feen, iha Distritu Dili.

Akuzasaun Prokuradór

Prokuradór akuza katak iha Marsu 2018, iha tuku 19.00 kalan, arguidu tuku lezada nia ulun dala ida, ibun dala rua no hasan dala rua. Arguidu mós foti tudik modo nian no hatudu ba lezada hodi hateten sei oho mate lezada bainhira lezada hakarak atu fila ba nia inan aman iha kalan ne'eba. Aktu hirak ne'e rezulta lezada sofre kanek iha ibun no bubu iha hasan no ulun.

Prokuradór akuza arguidu kontra artigu 157 KP kona-ba krime ameasa no kontra artigu 145 KP kona-ba ofensa ba integridade fizika simples, konjuga ho artigu 2, 3, 35(b) no 36 LKVD.

Produsaun ba prova sira

Iha prosesu julgamentu, arguidu konfesa totalmente ba faktu sira hotu hosi akuzasaun prokuradór no deklarata katak nia halo agresan hasoru lezada tanba hetan lezada nia mensazen ba mane seluk ne'ebé dehan sira atu hasoru no rei malu. Kona-ba ameasa lezada ho tudik, arguidu delara katak nia ameasa ho intensaun atu hata'uk lezada ne'ebé hakarak fila kedas ba nia inan-aman sira iha kalan ne'e. Arguidu arrepende ba nia hahalok no deklarata katak agora dadaun sira separadu ona.

Iha parte seluk, lezada kontinua konfirma ba faktu sira iha akuzasaun no konfirma ho arguidu nia deklarasaun katak sira separaona nu'udar feen no laen.

Alegasaun final

Prokuradór husu ba tribunál atu fó pena ne'ebé adekua ba arguidu tanba arguidu konfesa no arrepende ba ninia hahalok. Enkuantu defeza husu ba tribunál atu fó pena ne'ebé kmaan ba arguidu tanba arguidu foin primeiravés hatan iha tribunál.

Desizaun

Depoide avalia faktu sira hotu, tribunál prova katak arguidu tuku lezada nia ulun dala ida, tuku ibun dala rua no tuku hasan dala rua rezulta kanek no bubu. Aleinde ne'e prova mós katak arguidu uza tudik modo hodi ameasa lezada. Bazeia ba prova sira ne'e, tribunál konklui prosesu ne'e no kondena arguidu ho pena prizaun tinan ida suspende tinan rua.

26. Krime abuzu seksuál ba ema ne'ebé labele reziste

Nú. Prosesu : 0279/15.PDDDIL
Kompozisaun Tribunál : Koletivu
Juis : Dra. Edite Palmira dos Reis, Dra. Maria Modesta no Dr. Ivan Patricinio Antonino
Prokuradór : Dr. José Elo
Defeza : Dr. Marçal Mascarenhas
Tipu pena : Pena prizaun tinan 5

Iha 30 Jullu 2018, Tribunál Distritál Dili prezide julgamentu leitura akordaun ba krime abuzu seksuál ba ema ne'ebé labele reziste ne'ebé envolve arguidu RPM hasoru lezada RB ne'ebé ho kondisaun deficiente fizika⁶, ne'ebé akontese iha Distritu Aileu.

Akuzasaun Prokuradór

Prokuradór akuza katak iha data ne'ebé la apura maibé iha tinan 2014, iha oras kalan, lezada la'ó liuhosi dalan iha kafé laran atu ba ninia inan-boot nia uma. Arguidu hare hetan lezada la'ó mesak, arguidu dada lezada tama ba kafe-laran.

Arguiduhasai lezada ninia ropa no halo relasaun seksuál ho lezada. Tuir mai, iha data ne'ebé la apuradu, arguidu tuir lezada ba iha lezada nia inan-kiik nia uma no halo relasaun seksuál ho lezada. Aleinde ne'e, iha data seluk ne'ebé la apuradu, arguidu halo relasaun seksuál tan ho lezada iha toos-laran. Arguidu halo relasaun seksuál dala tolu to'ó lezada isin rua no arguidu aproveita lezada nia situasaun inkapasidade fizika. Akontesimentu hirak ne'e, lezada la informa ba família tanba tauk.

Prokuradór akuza arguidu kontra artigu 179 KP kona-ba abuzu seksuál ba ema ne'ebé labele reziste ho moldura penál hosi tinan 4 to'ó tinan 12 prizaun.

Produsaun ba prova sira

Iha prosesu julgamentu, arguidu konfesa parsialmente ba faktu sira katak nia halo duni relasaun seksuál ho lezada dala tolu maibé kona-ba oan ne'ebé iha lezada nia isin, arguidu rejenta tanba liutiha tinan ida mak lezada isin rua. Arguidu mós deklara katak se iha momentu ne'ebá lezada isin rua, arguidu prontu atu foti lezada sai nia feen. Maibé agora dadaun, arguidu iha ona feen. Arguidu arrende ba ninia hahalok no deklara katak iha momentu ne'ebá arguidu koko rezolve problema ne'e, maibé lezada nia maun lakohi rezolve. Entretantu, lezada kontinua konfirma faktu sira iha akuzasaun prokuradór nian.

Testemuña BB nu'udar lezada ninia kuiñada depoimenta katak nia hetan informasaun hosi lezada rasik katak bebe iha lezada nia isin ne'e, arguidu nia oan.

⁶Lezada sofre dificiente liman no ain kleuk no la'ó dada-an deit no koalia la-moos.

Alegasaun final

Prokuradór konsidera arguidu aproveita kondisaun defisiénsia lezada ninia hodi halo relasaun seksuál. Tanba ne'e maske arguidu nega katak nia la fó oan ba lezada, arrepende ona ninia hahalok, husu ba tribunál atu kondena arguidu ho pena prizaun tinan lima.

Entertantu defeza husu ba tribunál atu aplika pena ne'ebé kmaan ba arguidu tanba arguidu arrepende ninia hahalok no agora dadaun arguidu iha ona feen no oan nain ida.

Desizaun

Tribunál prova katak arguidu halo duni relasaun seksuál ho lezada dala tolu, maske arguidu hatene diak katak lezada ho kondisaun deficiente fizika iha liman no ain. Entretantu kona-ba lezada nia oan, tribunál la prova katak arguidu nia oan. Bazeia ba prova hirak ne'e, tribunál kondena arguidu ho pena prizaun tinan lima.

27. Krime kondusaun sein kartano armas brankas

Nú. prosesu	: 0001/18. DISTR
Kompozisaun Tribunál	: Koletivu
Juis	: Dr. Duarte Tilman, Dra. Sribuana da Costa no Dra. Zulmira A. Barris da Silva
Prokuradór	: Dr. Alfonso Lopes
Defeza	: Dr. Cancio Freitas no Dr. Miguel A. Fernandes (advogadu privadu)
Tipu pena	: Pena prizaun tinan tolu suspende ba tinan 3 no pena multa US\$30.00

Iha 30 Jullu 2018, Tribunál Distritál Dili prezide julgamentu leitura akordaun ba krimekondusaun sein karta no armas brankas ne'ebé envolve arguidu Domingos do Rosario do Santos, iha Distritu Dili.

Akuzasaun Prokuradór

Prokuradór akuza katak iha 07 Janeiru 2018, iha tuku 22.00 kalan, iha Porto Dili, polisia tranzitu halo *auto stop* ba transporte sira. Iha momentu ne'ebá polisia prende arguidu tanba kondús motor sein karta kondusaun, laiha sapa matrikula no laiha STNK orijinal. Aleinde ne'e, polisia hetan tudik ida iha hela bagajen motor nian.

Prokuradór akuza arguidu kontra artigu 207 KP kona-ba krime kondusaun sein karta ho moldura penál to'o tinan 2 ka multa no kontra artigu 2 no 20 (1) Lei Nú. 5/2017 kona-ba REGIME JURÍDICO RELATIVO À PRÁTICA DE ARTES MARCIAIS, RITUAIS, ARMAS BRANCAS, RAMA AMBON E QUINTA ALTERAÇÃO AO CÓDIGO PENAL ho moldura penál hosi tinan 3 to'o tinan 6 prizaun.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak tudik ne'ebé arguidu rai iha vagajen motor nian atu uza oho fahi iha lia mate ida iha Hudi laran/Bairo Pite. Arguidu deklarata katak nia laiha intensaun lori tudik atu buka problema.

Alegsaun final

Prokurador konsidera arguidu provadu komete krime tuir faktu iha akuzasaun prokurador, tanba ne'e husu ba tribunál atu kondena arguidu ho pena ne'ebé adekuaudu no justu.

Nune'e mós defeza husu ba tribunál atu aplika pena ne'ebé justu no adekuaudu tanba arguidu konfesa integralmente faktu sira iha akuzasaun, arrende ona ninia hahalok, primeiravés hatan iha tribunál no arguidu mós responsabiliza ba nia família.

Desizaun

Tribunál prova faktu sira hotu iha akuzasaun prokurador nian. Tanba ne'e, tribunál kondena arguidu ho pena prizaun tinan tolu suspende ba tinan tolu ba krime armas brankas. Entretantu ba krime kondusaun sein karta, tribunál kondena arguidu ho pena multa US\$30.00 ne'ebé arguidu sei selu gradualmente US\$0.50 kada loron durante loron 60. Tribunál mós kondena arguidu selu kustu judisial US\$20.00. Bainhira arguidu la selu pena multa refere, arguidu sei kumpri iha prizaun durante fulan rua nu'udar pena alternativa.

28. Krime ofensa ba integridade fizika simples ho natureza violénsia doméstika

Nú. Prosesu	: 0552/17.DICMR
Kompozisaun Tribunál	: Koletivu
Juis	: Dra. Edite Palmira, Dra. Maria Modesta, Dr. Ivan P. Gonalves
Prokurador	: Dr. Bartolomeu de Araujo
Defeza	: Dr. Joao Henriques Carvalho
Tipu pena	: Pena prizaun tinan 3 suspende ba tinan 3

Iha 30 Jullu 2018, Tribunal Distrital Dili prezide leitura akordaun ba krime ofensa ba integridade fizika simplesho natureza violénsia doméstika ne'ebé envolve arguidu MDS hasoru nia feen MdA no oan feto (JdA), iha Distritu Dili.

Akuzasaun Prokurador

Prokurador akuza arguidu katak iha 19 Otubru 2017, tuku 11.00 meudia, arguidu baku sira nia oan, nune'e arguidu no lezada diskute malu no arguidu basa dala rua iha lezada nia hasanloos no tuku dala ida iha lezada nia ulun.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu sira iha akuzasaun prokuradór nian, arrepende ninia hahalok no promete sei la repete ninia hahalok ne'e iha futuru hasoru lezada na'in rua.

Aleinde ne'e, lezada MdA (arguidu nia feen) kontinua konfirma faktu sira iha akuzasaun no deklara katak agora dadaun nia no oan na'in rua ba hela tiha iha nia inan-aman sira no oan na'in rua seluk hela ho arguidu tanba arguidu iha ona feen kiik.

Nune'e mós, lezada (JdA) kontinua konfirma ho faktu sira iha akuzasaun no deklara katak maske sira la hela hamutuk ho arguidu maibé arguidu sempre ba hare sira no fó sasan ba sira.

Alegasaun finál

Prokuradór husu ba tribunál atu kondena arguidu ho pena prizaun tinan tolu suspende ba tinan hat. Prokuradór konsidera arguidu provadu komete krime hasoru lezada na'in rua.

Entretantu defeza husu ba tribunál atu kondena arguidu ho pena prizaun maibé suspende tiha ninia ezekusaun tanba arguidu konfesa, arrepende ninia hahalok no promete sei la repete ninia hahalok ne'e iha futuru. Aleinde ne'e, arguidu mós nafatin sustensa sira nia oan tantu oan na'in rua ne'ebé hela ho lezada.

Desizaun

Depoide avalia faktu sira hotu, tribunál prova katak arguidu komete duni krime hasoru nia feen no oan tuir faktu sira iha akuzasaun. Tanba ne'e, tribunál konklui katak arguidu komete krime rua (hasoru feen no oan). Bazeia ba konkluzaan ne'e, tribunál kondena arguidu ho pena prizaun tinan rua fulan neen ba krime ne'ebé hasoru nia feen. Entretantu krime ne'ebé hasoru nia oan, tribunál kondena arguidu ho pena prizaun tinan ida. Hosi krime rua ne'e, tribunál fiksa pena úniku no kondena arguidu ho pena prizaun tinan tolu suspende ba tinan tolu inklui selu kustu judisiál US\$50.00.

29. Krime ofensa ba integridade fizika simples ho natureza violénsia doméstika

Nú. Prosesu	: 0546/17 DICMR
Kompozisaun Tribunál	: Singulár
Juis	: Dra. Maria Solana
Prokuradór	: Dr. Nelson de Carvalho
Defeza	: Dr. Marcelo Rosa no Dr. Acaçio Almeida
Tipu pena	: Pena admoestasaun

Iha 31 Jullu 2018, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JJF hasoru nia feen, iha Distritu Dili.

Akuzaun Prokuradór

Prokuradór akuza arguidu katak iha 12 Outubru 2017, iha tuku 16.00 lokraik, arguidu rasta lezada nia fuuk no baku ba iha parede no kauza lezada monu no ros nia ulun no liman ba iha parede. Aktu ne'e, rezulta lezada sofre kanek iha ulun no liman. Antes agresaun ne'e, lezada husu tuir kona-ba fetu ne'ebé lezada hare la'o ho arguidu, nune'e, sira diskute malu to'o mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa totalmente ba faktu sira iha akuzasaun prokuradór no deklara katak arrepende ba nia hahalok no foin primeiravés hatan iha tribunál. Arguidu diak malu ona ho lezada no promete sei la halo tan krime ne'e iha futuru.

Aleinde ne'e, lezada kontinua konfirma faktu sira iha akuzasaun no deklara katak diak malu ona ho arguidu.

Alegasaun finál

Prokuradór prova katak arguidu komete duni krime tuir faktu sira iha akuzasaun. Maibé tanba arguidu konfesa faktu sira, arrepende ba nia hahalok, diak malu ona ho lezada no promete sei la halo tan krime hasoru lezada iha futuru, husu ba tribunál atu aplika pena ne'ebé justu no adekua.

Entretantu, defeza husu ba tribunál atu aplika pena admoestasaun tanba konsidera sirkunstánsia atenuante sira hanesan saida mak prokuradór temi.

Desizaun

Depoide avalia faktu sira hotu, tribunál prova katak arguidu komete duni krime tuir faktu sira iha akuzasaun prokuradór nian. Bazeia ba faktu provadu hirak ne'e inklui tetu sirkunstánsia hotu-hotu, tribunál kondena arguidu ho pena admoestasaun.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

www.jsmp.tl